



Inatsisartuni ilaasortaq  
Naaja H. Nathanielsen  
Inuit Ataqaatigiit  
/maani

§ 37 naapertorlugu apeqqummut nr. 2013-248-mut akissut

*Asasara Naaja H. Nathanielsen,*

Sanaartornerluttarneq aammalu issittumi sanaartornermi pissutsit eqqarsaatigineqartannginnerat ilisimaneqartannginneralluunniit pillugit apeqqutinnut qujanaq.

Aperivutit:

*Siunissami sanaartornerit Issittumi silap pissusaanut atatillugu unammisassanut ullumikkornit annertunerusumik naleqqussaanissaq siunertaralugu qulakkeerinissaq, taamatullu sanaartornerlunnerit uparuartarneqarnissaat pinngitsortinneqarnissaallu siunertaralugit nakkutilliinerup annertusinissaa pillugit sanaartornermut inatsisit allanngortinnissaannut tigussaasunik pilersaaruteqarpa?*

*Taamaassimappat: Allannguutit qaqugu atuutilersinnaanerit ilimagineqarsinnaava?*

Akissut:

Sanaartornermut inatsimmi – maannarpiaq sanaartorneq pillugu Inatsisartut inatsisaanni nr. 13-imi, 26. maj 2010-meersumi atuutsinneqartumi – siunertat pingaernerit tassaapput,

- sanaartukkat ikuallattoornissaq, isumannaassuseq peqqissuserlu eqqarsaatigalugit naammaginartumik toqqjissimanassuseqarnissaat siunertaralugu suliarineqartarnissaat ilusilerneqartarnissaallu, aamma
- sanaartukkat nunaminertallu sanaartorfigineqanngitsut taakkununga atasut illersorsinnaasumik atorneqarnissaat aserfallatsaaliorneqarnissaallu eqqarsaatigalugu naammaginartumik pitsaassuseqartinneqarnissaat.

Sanaartornermut inatsit naapertorlugu Illuliornermut Malittarisassat 2006-imeersut, aammalu peqqussutit innersuussutillu, nunatsinni maani sanaartornermi misilittakkat ilisimasallu, ukiorpassuarni katersorneqarsimasut arlallit Naalakkersuisunit nassiussuunneqartarput.

Illuliornermut malittarisassat nutaat iluarsaanneqartut suliarineqarput, taakkulu 2015-imiit atuutilertussatut naatsorsuutigineqarput. Illuni nukissiuutinik atuinermut piumasaqaatit sakkortusineqarnerisa saniatigut illut ussissusissaannut piumasaqaatit, kiisalu illuni isugutaap ajoqusiisinnaaneranut oqoqalersinnaanermullu pinaveersaartitsinissamut piumasaqaatit illuliornermut malittarisassanut nutaanut ilanngunneqassapput. Tamatuma kingunerisaanik sanaartugassanik

12-12-2013  
Sags nr. 2013-093194  
Dok. nr. 1420729

Postboks  
3900 Nuuk  
Tlf. (+299) 34 50 00  
Fax (+299) 34 54 10  
E-mail:  
www.nanoq.gl

pilersaarusiornermi, suliniuteqarnermi, neqerooruteqartitsinermi sananermilu silap pissusai tunngavigalugit sanaartukkat illersorneqarsinnaasumik atasinnaanissaannut alloriarnissat pisariaqartinneqartut suliarineqarnissaat piumasaqaatigineqassaaq. Illuliami naammassisumi illup sannaani atortunilu ussissusissamut piumasaqaatinik aammalu isugutaqarfiusut ulorianartorsiorfiusinnaanerinit piumasaqaatinik naammassinissimanermut uppersaatit uttortaasoqartarnissaa sananissamut akuersissummi piumasarineqarsinnaavoq.

Suliniutissanut taakkununga allanullu ilaatigut nunat tamalaat Sisimiuni ataatsimeersuarneranni Artek Event 2012-imi, tassalu: "Challenges for the Arctic Building Industry"-mi ilanngussat inerniliinerillu isumassarsiorfigineqarput. Ataatsimeersuarnermi issittumi sanaartornermi unammilligassat, aammalu illuni il.il. sannarluttoqarnerani, isugutaap ajoqusiinerani oqoqalernermilu ajornartorsiutit qanoq iliorluni isumagineqarsinnaanerat pinngitsoorneqarsinnaanerallu sammineqarput.

Aamma siunnerfiit allat aallaavigalugit Naalakkersuisut sanaartornermi ilisimatusarnerit attuumassutilit ineriartornerinit DTU/Artek aamma Aalborg Universitet/SBi, ilaatigut nunani avannarlerni sanaartornermi ilisimatusarnerit ataatsimoorussanut peqataasut aqutugalugit malinnaapput.

Sanaartornermi suliasat ataatsimut isigalugit kukkusoqarnissaa tamatumalu saniatigut aningaasartuuteqarnerunissaq pinngitsoorniarlugu pisortat sanaartortitsinerisa nakkutigineqarnerisa sukannernerulersinneqarnissaa Naalakkersuisooqatigiinnissamut isumaqatigiissummi anguniakkanut ilaavoq.

Tamanna tunngavigalugu Naalakkersuisut suliniut "Sanaartukkanik aqutsineq sukannernerusoq" aallartippaat: Aallarniutaasumik 'suliat ajornartorfiusut' aalajangersimasut apersuillunilu misissuinerit ingerlanneqareerpata sanaartukkanik aqutsinissamut ilitsersuusiortoqassaaq, tamatumalu kingorna sanaartornerup iluani sanaartukkanik aqutsisut/sullissisut ikinnerpaamik 20-t pikkorissartinneqarnissamik neqeroorfigineqassapput. Suliaq SBi aamma Byggecentrum suleqatigalugit ingerlanneqartoq 2013-imi aallartinneqarpoq, pilersaarutillu malillugit 2014-imi ukiup affaata siulliup ingerlanerani naammassineqassalluni. Suliami iluatsitsinissaq apeqqutaalluni pisariaqartitsineq malillugu pikkorissartitsinerinik allanik ingerlatsisoqarsinnaavoq.

Aamma Namminersorlutik Oqartussat iluanni sanaartornermik suliasaqarfiup pitsaanerumik aqqissuunneqarnissaanik aallartitsinissaq Naalakkersuisut pilersaarutigaat. Pisussat tamarmik pilersaarutaasutut ingerlanneqarpata, Namminersorlutik Oqartussani sanaartornermi aserfallatsaaliuinermilu suliasat suliarineqartarneri 2014-imiit sanaartornermut immikkoortortaqaqfimmu, Ineqarnermut Naalakkersuisoqarfimmi siunertamut pilersinneqartussamut katersuunneqassapput. Suliasat sanaartornermut immikkoortortaqaqfimmi qitiusumi suliarineqartarneranni iluaqutissat paatsuugassaangillat:

- isumalluutit pisariaqartinneqartut, suliat ingerlasarnerinit pisariusunut unammilligassanullu naleqqunnerusinnaasut ajornannginnerusumik pissarsiarineqarsinnaaneri, pingaaruteqarluinnartutullu

- aningaasaqarnermut pilersaarusiak aammalu nuna tamakkerlugu pilersaarusiak immikkoortunullu pilersaarusiak akornanni pitsaaneruseqarnermik ataqatigiissaarneqarsinnaaneri.

Sulianik suliallu ingerlanerini aqutsissutit digitaliusut atornerqarnissaasa pingaartinneqarnerata saniatigut, sanaartukkani kukkusinnaaneri tamatumalu kingunerisaanik ajoqusersinnaaneri annikillisinneqarnissaat, taamaalillunilu siunissami inuiaqatigiit aningaasaqarnerannut iluaqutaasussamik illuutit piusinnaassusiisa sivitsorneqarnissaat siunertarineqarpoq.

Akikinneruseqarnermik pisariinneruseqarnermillu sanaartornissamut piunarsaqaatit ataavartut, atortut misilerarneqanngitsut nutaat pissarsiarineqarsinnaanerat, nukissiuutinik atuinissamut piunarsaqaatit sukannerneruseqarnermik, tamatumalu kingunerisaanik illut ussinnerunissaannut piunarsaqaatit, aammalumi silap pissusiani allannguutit annertuut, illunik ilusilersuisartunut sanaartortunullu unammilligassanik nutaanik pilersitsiarput.

Web-ikkut iserfissiaq byginfo.gl aqqutigalugu inatsisit, peqqussutit, innersuussutit, naqitat paasissutissallu sanaartornermut attuumassuteqartut pissarsiariuminarsarneqarput. Sanaartornermut iserfissiaq issittumi sanaartornermi ilisimasanik misilittakkanillu ingerlatitseqqittarnermi sakkussatut pingaarutilittut Naalackersuisut isigaat, aammalu web-ikkut iserfissiaq ineriartornerata ingerlaqqinnissaa siunnerfigalugu.

Neriuppunga akissuteqaatiga naammaginatutut isumaqarfigissagit.

Inussiarnersumik inuulluaqqusillunga

Siverth K. Heilmann